

Matinette - Año 1 - Number 4 - December, 1984.





ARUBA y su DANDE!!

E palabra "Dande" ta nifica Paranda. Nos por comparé cu un gaita Venezolano, aunque cu un gaita ta mas riba calla y un dandé ta estrictamente den cas di familia. Aruba conocé Dande masha tempo caba, promer cu esclavonan a jega. Ningun hende no sabi ta kende ni exactamente na ki aña el a wordo introduci aki.

Ta wordo aceptá cu Dande ya tin mas cu 200 aña na Aruba y cu posiblemente a nace sea na Savaneta o na Sta Cruz.

Dande ta encerrá un saludo di Aña Nobo y bon deseo- nan pa e familia cu nan ta bishitá. E grupo di Dande ta cuminsa toca y canta, pues cuminsa su paranda, ma- yoria bez despues di tiro, esta despues di 12'or mei anochi. Na otro manera bisá, despues di cambio di aña. E anochi ey ningun hende no ta keda drumi, te hasta e muchanan ta wordo lantá pa warda tiro. Tiro no mag di bati bo den cama, esey ta mala suerte. Esaki a bira un tradicion, pues cu tur hende mester ta na cas, hunto cu familia pa celebrá cambio di aña y pa warda e bishi- ta di un Dande, pasobra cu nan musica e Dande ta tre- ce suerte y bendicion den e aña nobo.

Den nan palabranan o frasenan bo por tende esaki; p.e. "Ay nobé" kier meen "añ nobé" cu ta naturalmente "aña nobo".

Un Dande ta canta tur miembro di familia, especial- mente e Tata y e Mama y e jiu mas chikito di cas.

"O, dande, preto di wowo di su mamachi, ay nobe"

Si tin un persona bieo ta biba na e cas, nan lo canté:

"O, dande, bida largo, bida nobo, ay nobe",

"O, dande, bendicion pa Shon, ay nobe".



E wijs semper ta keda mescos, tambe e coro. E frase- nan ta cambia un poco segun inspiracion di e cantan- te. Pues loque e cantante ta mira of loque e sabi di e persona e ta canté.

Un dande ta usa cierto instrumentnan di musica. Esunan mas original ta un Fíó (viool) y un simfonia di man tin biaha di boca. Tambe un tambú y un wiri no por falta. Despues a bin acerca e Cachete (di buri- co), maraca, clabillo y mas despues Marimba, Cuarta, Guitara, Mandolin, etc.

Den un Dande semper tin un persona cu un sombré den su man. Esaki ta hopi biaha e cantante mes, pero por ta un persona di e coro tambe. Antes e familia cu nan bishitá tabata tira pan dushi o boyo den e sombré of cualquier otro regalo. Durante ultimo añanan esaki a bira placa. Cu e placa aki nan ta cubri gastonan di instrument of nan ta partié pa cada un haya un parti igual. E tiramento di placa tin un nificacion simboli- co, y esey ta: Esun cu bishita bo Aña Nobo lo no bai man bashi, pasobra esun cu duna di bon voluntad lo ser repagá.

Apenas 30 o 40 aña pasá Aruba tabata tin hopi grupo di Dande, cu tabata para di tempran p'afor di cas, spe- rando tiro dal pa nan por drenta cas di un familia. Ta lamentable cu e tradicion aki a cai hopi cu nos tem- po moderno.

Tin hopi di boso cu no sabi kiko ta un Dande exacta- mente. Laga nos spera cu ora tiro dal dia 31 di Decem- ber pa anuncia jegada di aña 1985, nos por keda sor- prendi di mira cuanto Dande a bolbe lanta cabez na Aruba y asina revivá un tradicion valioso cu ta Aruba só conocé den henter Antillas.

